

# Kewujudan UMS bantu k'jaan bangunkan Sabah

**KOTA KINABALU:** Universiti Malaysia Sabah (UMS) yang memulakan pengajiannya pertengahan tahun ini, akan dapat membantu kerajaan dalam usahanya memajukan Sabah, kata Ketua Menteri, Datuk Salleh Said Keruak.

Katanya UMS yang mengutamakan penyelidikan dan pembangunan ilmu akan dapat melibatkan tenaga akademiknya dalam sebarang rancangan sosio-budaya dan sosio-ekonomi di negeri ini.

"Mereka boleh memberi input kepada mana-mana agensi kerajaan dan sektor swasta yang memerlukan sumbangan ilmu dan kepakaran mereka,"

katanya pada upacara pecah tanah tapak kampus tetap UMS di Teluk Likas dekat sini yang dilakukan Perdana Menteri, Datuk Seri Dr Mahathir Mohamad.

Salleh berharap UMS sebagai penggerak pembangunan intelektual berupaya melahirkan siswazah yang cekap dan bermutu bagi memasuki era teknologi maklumat, antar-rangkaian dan sejagatan dunia.

Katanya kerajaan negeri sedang berusaha bersungguh-sungguh untuk mengangkat Sabah menjadi sebuah negeri yang maju dengan menggerakkan ekonominya selari dengan falsafah negara.

Beliau memberi jaminan bahawa kerajaan Barisan Nasional (BN) Sabah akan sentiasa memberi sokongan terhadap UMS bagi membolehkannya muncul sebagai sebuah institusi pendidikan yang cemerlang di negara ini.

Sementara itu Menteri Pendidikan, Datuk Seri Najib Tun Razak berkata para graduan yang bakal lahir dari UMS akan merupakan mereka yang serba mahir kerana kurikulumnya yang bersifat progresif.

Katanya kurikulum UMS cukup seimbang kerana separuh waktu pembelajarannya ditumpukan kepada program teras sekolah manakala separuh lagi diisi dengan program penataran ilmu.

"Kemahiran seperti pengetahuan tentang dasar negara, sejarah, ilmu komputer, kemahiran berfikir termasuk berfikir secara kreatif dan lateral, keupayaan bersyarah dan kaedah berunding yang lebih mahir," katanya.

Najib juga berkata kewujudan UMS amat sesuai memandangkan negeri ini kaya dengan sumber alam semula jadi yang boleh dijadikan bahan kajian dan penyelidikan.

Selain mengisi keperluan terhadap institusi pengajian tinggi, UMS lahir bagi memenuhi janji BN semasa pilihan raya negeri awal tahun lepas berikutan permintaan yang begitu banyak daripada rakyat Sabah yang mahukan sebuah universiti ditubuhkan di negeri ini.

UMS memulakan pengajiannya Julai tahun ini di kampus sementara Kolej Komuniti Yayasan Sabah di sini, dengan pengambilan kumpulan pertama pelajar seramai lebih 200 orang dari seluruh negara.

Fasa pertama kampus yang dibina dengan harga RM200 juta itu akan siap pada 1998.